

आकाशवाणी जयपुर-अजमेर
प्रादेशिक समाचार

दिनांक 11.08.2025

समय: 18.45 बजे

- केन्द्रीय कृषि मंत्री शिवराज सिंह चौहान आज झुंझुनूँ ऊं पीएम फसल बीमा योजना रा दावां री रकम रो चुकारो कीनो-देशभर रा 35 लाख ऊं बत्ता किसानां रा खातां मांय 3 हजार 900 करोड़ रुपया भेजी ज्या।
- प्रधानमंत्री नरेन्द्र मोदी कह्यो-21वीं सदी रो भारत वां री जिम्मेदारियां रा प्रति संवेदनशील अर विकास री मंशा राखे है।
- केन्द्रीय मंत्री गजेन्द्र सिंह शेखावत हर घर तिरंगा अभियान ने जनता ने स्वतंत्रता सेनानियां ऊं जोड़बा रो मोटो उत्सव बतायो।
- राज्य मांय चौमासा री बिरखा मांय सुस्ती-15 अगस्त ऊं ओजू मेह व्हेवण रा आसार।

000

प्रधानमंत्री फसल बीमा योजना रा तैत दावां रा चुकारा रा तौर ऊं आज देश रा 35 लाख ऊं बत्ता किसानां रा खातां मांय 3 हजार 900 करोड़ रुपया डीबीटी रे मार्फत भेजी ज्या। प्रदेश रा 9 लाख 70 हजार किसानां रा खातां मांय ई 1 हजार 400 करोड़ रुपया भेजी ज्या। झुंझुनूँ मांय राख्यी ज्या कार्यक्रम मांय केंद्रीय कृषि अर किसान कल्याण मंत्री शिवराज सिंह चौहान रिमोट रो बटन दबा र आ रकम किसानां रा खाता मांय भेजी। कार्यक्रम मांय मुख्यमंत्री भजनलाल शर्मा अर केंद्रीय कृषि राज्य मंत्री भागीरथ चौधरी ई मौजूद रह्या। ई मौके केंद्रीय कृषि मंत्री कह्यो के नरेंद्र मोदी सरकार फसल बीमा योजना मांय मोटा तौर ऊं सुधार कीना है, ज्यीं पाछे अब एक गांव मांय फसल खराबो व्हेवण री सूरत मांय ई किसानां ने बीमा दावा री रकम मिले है। वे कह्यो के साल 2016 ऊं हाल ताई देश रा किसानां ने फसल बीमा दावा रा चुकारा रा तौर ऊं 2 लाख 12 हजार करोड़ रुपया दिया ज्या है। श्री चौहान कह्यो के किसानां री आमदनी बधा र वां ने खुशहाल बणावण रा मकसद ऊं केंद्र सरकार लगातार फैसला ले रही है। केंद्रीय मंत्री नकली खाद-बीज बेचण वाळां ने चेताता थकां कह्यो के किसानां सागे दगो करण वाळां ने नी छोड़्या जावेला। श्री चौहान कह्यो के सरकार नकली खाद- बीज बणावण अर बेचण वाळां रे खिलाफ़ करड़ी कार्रवाई करण रा मकसद ऊं बेगो ई नुवो कानून बणावण री तैयारी कर रही है।

000

कार्यक्रम मांय मुख्यमंत्री भजन लाल शर्मा किसानां ऊं वैज्ञानिक तरीका ऊं खेती करण सागे खाद छावती तादाद मांय ई काम लेवण री अरज कीनी। वे कह्यो के मिट्टी री जांच पाछे ई जरूरत रे मुताबिक खाद काम लेवणी चाहिजे।

000

कार्यक्रम मांय केन्द्रीय कृषि राज्यमंत्री भागीरथ चौधरी, राज्य रा कृषि मंत्री डॉ. किरोड़ीलाल मीणा, झुंझुनूँ जिला रा प्रभारी मंत्री अविनाश गहलोत अर जनता रा नुमाइन्दां सागे मोटी तादाद मांय किसान अर ढांढा-ढोर राखण वाळा शामिल व्हा।

000

प्रधानमंत्री नरेन्द्र मोदी कह्यो है के 21वीं सदी रो भारत वां री जिम्मेदारियां रा प्रति संवेदनशील है अर विकास री मंशा राखे है। श्री मोदी आज नई दिल्ली मांय सांसदां सारू बणायी ज्या नुवा प्लैट्स रा उद्घाटन रे मौके बोल रह्या हा। प्रधानमंत्री कह्यो के आं मकानां मांय न्यारा-न्यारा राज्या ऊं चुण्या जावण वाळा सांसद एके सागे रह सकेला जो एक भारत-श्रेष्ठ भारत रा नजरिया ने बतावे है। वे कह्यो के सांसद नुवा प्लैट्स मांय रहता थकां वां रो बगत अर ऊर्जा बेहतर तरीका ऊं जनता री परेशानियां आगी करण मांय लगावेला।

000

नगरीय विकास मंत्री झाबर सिंह खर्वा आज भरतपुर दौरे पर रहे। उन्होंने सर्किट हाउस में भाजपा कार्यकर्ताओं से मुलाकात की। उन्होंने नगर निगम में अधिकारियों की बैठक लेकर शहर में चल रहे विकास कार्यों की समीक्षा की। श्री खर्वा ने शहर में विभिन्न विकास कार्यों का लोकार्पण और शिलान्यास भी किया। बाद में उन्होंने पौधा लगाकर हरित राजस्थान का संदेश दिया।

000

प्रदेश मांय गृह रक्षा स्वयंसेवक-होमगार्ड री सदस्यता री मियाद पांच साल ऊं बधा र 15 साल कर दीरीजी है। पुलिस महानिरीक्षक संदीप सिंह चौहान आ जाणकारी दीनी। वे बतायो के गृह रक्षा विभाग मांय 3 हजार 842 गृह रक्षा स्वयंसेवकां रा नाम माण्डण री प्रक्रिया आवता महीना व्हेला। ई सारु पैली ऑनलाइन तरीका ऊं अर्जी देवण वाळां रा नाम माथे विचार कर्यो जावेला। वे बतायो के महकमो होमगार्ड रो मानदेय बधायो है। श्री चौहान बतायो के होमगार्ड रा चयन री प्रक्रिया मांय मौखिक परीक्षा री ठौड़ शारीरिक दक्षता रा 25 अर विशेष योग्यता रा 20 नम्बर समेत कुल 45 नम्बर रा आधार ऊं मेरिट बणायी जवेला।

000

केन्द्रीय संस्कृति अर पर्यटन मंत्री गजेन्द्र सिंह शेखावत कह्यो है के हर घर तिरंगा अभियान एक उत्सव ई नहीं, बल्कि जनता ने स्वतंत्रता सेनानियां ऊं जोड़बा अर आजादी री लड़ाई लड़बा वाळां ने सिरधा भाव सागे याद करण रो मौको है। वे आज खबरनवीसां ने ई अभियान री तैयारियां अर कार्यक्रमां री जाणकारी देता थकां कह्यो के तिरंगो झण्डो फहरावण ऊं देश रा जन-जन मांय देशभक्ति री भावना उपजे है अर देश सारु सब कुछ निछावर कर देवण री सीख मिले है। श्री शेखावत कह्यो के राज्यां री सरकारां सागे तालमेल कर र तिरंगा झण्डा री उपलब्धता तैय करी ज्यी है।

000

हर घर तिरंगा अभियान रा तैत प्रदेश मांय आज ई केई कार्यक्रम राख्यी ज्या। भरतपुर मांय तिरंगा साइकिल रैली निकाळी ज्यी। ज़िला कलेक्टर कमर चौधरी रैली ने पुलिस परेड मैदान ऊं हरी झंडी बता र रवाना कीनी। रैली मांय प्रशासन रा अहलकार, पुलिस वाळा, एनसीसी रा कैडेट्स, स्काउट-गाइड अर मोटी तादाद मांय आमजन शामिल व्ह्या। पाली मांय निकाळी ज्यी रैली मांय जनता सागे पैली वाळा फौजी अर मोटी तादाद मांय नौजवान शामिल व्ह्या। हर घर तिरंगा अभियान रा तैत बाड़मेर मांय जनता रे आवण-जावण री ठौड़ां अर जलाशयां माथे श्रमदान करी ज्यो। कोटपूतली-बहरोड़ मांय स्कूली बच्चा रैली निकाळ र देश रा एका रो संदेश दीनो। एक स्कूल री एनसीसी कैडेट इशिका बतायो के रैली मांय शामिल व्हे र वां ने माथो ऊंचो व्हेवण रो अहसास व्ह्यो।

000

सलूम्वर रा जिला कलेक्टर अवधेश मीणा जनता ऊं हर घर तिरंगा अभियान मांय बत्ती ऊं बत्ती तादाद मांय शामिल व्हे र इण ने जनता रो आन्दोलन बणावण री अरज कीनी।

000

झालावाड़ रा ज़िला कलेक्टर अजय सिंह राठौड़ ई अहलकारां अर कर्मचारियां ने आप-आप रा रहवास माथे तिरंगो झण्डो फहरावण री सौगंध दिरायी। बालोतरा ज़िला रा समदड़ी मांय देशभक्ति रा गीत बजाता थकां रैली निकाळी ज्यी, जिण मांय मोटी तादाद मांय विद्यार्थी अर आमजन शामिल व्ह्या।

000

15 अगस्त ने मनाया जावण वाळा स्वतंत्रता दिवस ने ध्यान राखता थकां राज्य मांय सावचेती बधा दीरीजी है। स्वतंत्रता दिवस रे मौके ई साल राज्य स्तर रो जळसो जोधपुर मांय राख्यो जावेला। इण ने ध्यान राखता थकां आखा जोधपुर संभाग मांय निगराणी राख्यी जा रही है। ई रा तैत दूजी ठौड़ां ऊं आ र होटलां अर धर्म शालावां मांय रुकण वाळां री जांच करी जा रही है। राज्य री पाकिस्तान ऊं लाग्योड़ी सरहद माथे घुसपैठ री शंका ने ध्यान राखता थकां बीएसएफ री ओर ऊं आज ऑपरेशन हाई अलर्ट सुरू करी ज्यो। बीएसएफ रा उपमहानिरीक्षक योगेन्द्र सिंह राठौड़ बतायो के 17 अगस्त ताई चलाया जावण वाळा ई ऑपरेशन रा तैत लगातार गश्त सागे चौकसी और बधायी ज्यी है। वे बतायो के उत्तराद हलका रा जवानां सागे वां रो हौसलो

बधावण सारू अहलकार ई तैनात करी ज्या है। श्री राठौड़ बतायो के ऑपरेशन हाई अलर्ट रा तैत सरहदी हलका रा गांवां रा लोगां मांय जाग जगावण सागे ई खुफिया विंग री ओर ऊं जांच-पड़ताल ई तेज़ कर दीरीजी है।

000

प्रदेश मांय आं दिनां पछुवा बायरो बाजण ऊं बिरखा रो जोर कम पड़ गयो है। ई कारण आवता तीन-चार दिन राज्य मांय घणखर ठौड़ां घणी बिरखा व्हेवण रा आसार नी है। मौसम विभाग रे मुजब 14 अगस्त पाछे बंगाल री खाड़ी ऊं पुरवाई बाजण रा आसार है, जिण ऊं राज्य रा ऊगणी हलकां मांय 15 अगस्त जद के आतूणी हलका रा कुछ हिस्सां मांय 16 अगस्त ऊं चौमासा री बिरखा रे ओजू जोर पकड़बा री संभावना है। महकमा रे मुजब 15 अगस्त ने कोटा अर 16 अगस्त ने उदयपुर संभाग मांय कठे-कठे जोरदार मेह रा आसार है। ई बीचे लारला 24 घंटां मांय बारां, भरतपुर, दौसा, सीकर अर झुंझुनूं समेत केई जिलां मांय हल्की बारिश व्ही।

सब ऊं बत्ती 5 सेंटीमीटर बारिश बारां जिला रा अटरू मांय दर्ज करी ज्यी।

000

प्रदेश मांय मौसमी बीमारियां री रोकथाम अर वां माथे काबू करण सारू स्वास्थ्य विभाग री ओर ऊं खास अभियान **स्वास्थ्य दल आपके द्वार** चलायो जा रह्यो है। ई अभियान रा तैत जनता ने मच्छरां ऊं व्हेवण वाली मलेरिया अर डेंगू समेत न्यारी-न्यारी बीमारियां रा बारा मांय जाणकारी दी जा रही है। डींग मांय पाणी भरण वाळा हलकां मांय लारवा खत्म करण सागे मच्छर मारण री दवाइयां रो छिड़काव कर्यो जा रह्यो है। म्हाणी खबरनवीस बतायो के अभियान मांय जनता रा नुमाइन्दा ई आगे आ रह्या है।

000